

TIRANDO LE CONCLUSION

Na considerazion vecia ma atual ades in sta situazion che no se-capiše ndove che ła- ne porta:

Mi, al momento, co ła mé età no varie ła prospetiva de ła Casa de Riposo, ché se-sa źa che fine che farie là. Come che ho źa dit: da sta situazion no vien-fora vivi nišun: col virus de sto ano é vegnù-fora na straje drento e fora de le Case de Riposo.

Invenze par quei che sta relativamente ben, esempio mi, el pericoło ‘l-é che se te-veše da małarte, te-vien ciapà da ste nove strutture e no i- te moła pi, anca parché ‘l-é el só lavoro: ste strutture del Veneto le-produse de media 17, 80, 90, anca zento morti al giorno – moltiplica par 5000 euro ‘l un minimo, no son bon de far ła moltiplicazion da tanti euri che vien-fora e quei che va ben i-é quei de le pompe funebri.

No se-salva nišun. Mi me sa che i-é tuti d’acordo. El mort el-mete in moto na machina infernal, no ghe ne parlen del zimitero che ‘l-é diventà na fabrica anca quel: te-vede che i-cava-su i morti veci e i-mete-drento quei novi; se no te-va-drento nte ła tomba de fameja ché ghe n’è de quele che le-par cese foderae de marmi e in queste el mort el-riposa proprio in pase, magari ‘l-é drento lu-lu sol ma presto o tardi ghe rivarà compagnia.

Mi ho źa scrit che vui ešar portà-su in cesa bonora e senza farghe saver gnent a nišuni anca parché al de-fora de ła fameja, a chełtri no gh’en importa gnent, dopo brusà, vui ešar mes in un posto che ocupe poc posto; no vui ešar portà in giro co Maserati, Giaguar, Mercedes – se no son ndat-via da vivo co sti machinoni, vuł-tu che vae-via da mort?

Tut el resto ‘l-é cine.